

### Cefndir

**Genomeg** yw astudio holl genynnau person (y genom), gan gynnwys rhyngweithio rhwng y genynnau hynny â'i gilydd a chydag amgylchedd y person. **Geneteg** yw astudio genynnau ac etifeddiaeth. Mae'r ddau yn chwarae rhan gynyddol bwysig o ran gwella iechyd personol ac iechyd y cyhoedd, gan gyfrannu at ddiagnosis, atal, trin a goruchwyllo clefydau.

Ym mis Gorffennaf 2017, lansiodd Llywodraeth Cymru ei strategaeth uchelgeisiol i drawsnewid y ddarpariaeth o brofion geneteg a genomeg o fewn GIG Cymru:

<https://llyw.cymru/sites/default/files/publications/2019-04/strategaeth-genomeg-ar-gyfer-meddygaeth-fanwl.pdf>

Sefydlwyd **Partneriaeth Genomeg Cymru** i gynrychioli nifer o sefydliadau, arbenigwyr a disgyblaethau sy'n gweithio ym maes gofal iechyd, sydd gyda'i gilydd yn anelu at drawsnewid y gwasanaethau genomeg er budd cleifion yng Nghymru.

Sefydlwyd Bwrdd Seinio Cleifion a'r Cyhoedd yn 2019. Recriwtiwyd cleifion ac aelodau o'r cyhoedd gydag ystod eang o brofiadau yn ymwneud â phroffion geneteg a genomeg. Nod y grŵp hwn yw cynrychioli dinasyddion Cymru wrth i ni weithio gyda'n gilydd i wella profiad cleifion ac yn y pen draw, iechyd a lles ein poblogaeth.

Mae ein dull Cynnwys Cleifion wedi'i ddatblygu er mwyn:

- Dangos ymrwymiad i weithio mewn modd agored a thryloyw gyda chleifion a'r cyhoedd, gan ddefnyddio eu profiadau ar y cyd i lunio ac ychwanegu gwerth at waith Partneriaeth Genomeg Cymru a gwasanaethau genomeg yng Nghymru yn y dyfodol
- Defnyddio profiadau cleifion a'r cyhoedd i wella'r llwybr gofal i gleifion, o'r rhyngweithio cyntaf i'r olaf
- Cyd-gynhyrchu dull agored, tryloyw ac y cytunwyd arno'n gyhoeddus o rannu data genomeg a meddygaeth fanwl ar gyfer datblygu gwasanaethau, gofal clinigol ac ymchwil
- Gwella ymwybyddiaeth a dealltwriaeth y cyhoedd o genomeg, gan sicrhau ei bod yn dod yn faes gofal iechyd hygyrch i ddinasyddion Cymru

Rydym yn cydnabod bod y materion a'r ffactorau sy'n ymwneud â geneteg a genomeg yn gymhleth. Hoffwn weithio gyda chleifion ac aelodau o'r cyhoedd, i esbonio pethau mewn ffordd glir a syml, gan rymuso dinasyddion Cymru i ddeall mwy am yr hyn y gall genomeg ei olygu iddynt.

**Hoffem recriwtio carfan newydd i ymuno â'r Bwrdd Seinio Cleifion a'r Cyhoedd hwn ac ehangu'r aelodaeth bresennol. Dyma'ch cyfle i lunio'r ffordd rydym yn sôn am geneteg a genomeg, ac i wella profiad cleifion i bawb sy'n dod i gysylltiad â'n gwasanaethau genomeg glinigol yng Nghymru. Rydym yn chwilio am unigolion sydd ag ystod eang o brofiadau – gweler manylion y rôl isod.**

Ymgynghorwyd â'r Bwrdd Seinio presennol ar nifer o bynciau hyd yma gan gynnwys:

- Dewisiadau ar gyfer cymryd caniatâd cleifion i ddefnyddio eu data genomeg / samplau ar gyfer ymchwil

# DISGRIFIAD SWYDD

## Bwrdd Seinio Cleifion a'r Cyhoedd



- Dylunio gwefan dda sydd â'r cynllun, y cynnwys a'r ymarferoldeb mwyaf addas
- Ffyrdd o wella ardaloedd clinig a manau aros yn y gwasanaeth genomeg
- Cynllunio a deall ystyriaethau o safbwynt cleifion a'r cyhoedd ar gyfer lleoliad newydd arfaethedig y gwasanaethau genomeg
- Cynnwys taflenni gwybodaeth a deunydd ategol arall ar gyfer apwyntiadau
- Ystyriaethau penodol i gleifion wrth gyflwyno rhai gwasanaethau genomeg newydd
- Sut y gall rhaglenni eraill sicrhau y gall cleifion a'r cyhoedd gael eu cynnwys yn eu gwaith
- Cynnwys ac ymagwedd ar gyfer cynhadledd fawr oedd yn hyrwyddo pob agwedd ar genomeg
- Cynnwys cyrsiau hyfforddi ar gyfer gweithwyr iechyd proffesiynol i sicrhau bod anghenion cleifion yn cael eu hystyried
- Cynnwys y Cynllun Cyflawni ar gyfer genomeg yng Nghymru; sut y dylid datblygu cynnwys cleifion, egwyddorion cyffredinol y dylid glynu wrthynt a chyfleu'r Cynllun i gynulleidfa eang

Bydd y Bwrdd Seinio yn parhau i weithio gydag aelodau eraill o Bartneriaeth Genomeg Cymru i sicrhau bod cleifion a'u teuluoedd yn parhau i fod wrth wraidd ein gwaith.

*Ers dechrau'r pandemig, mae sesiynau rhithwir wedi disodli cyfarfodydd wyneb yn wyneb – bydd y trefniant hwn yn parhau hyd nes y bernir ei bod yn ddiogel cyfarfod yn bersonol. Ar yr adeg honno, bydd trefniadau cyfarfodydd yn y dyfodol yn cael eu trafod gydag aelodau'r Bwrdd Seinio.*

## Y Swydd

### Cyfrifoldebau

Fel aelod o'r Bwrdd Seinio bydd gofyn i chi:

- Fynychu cyfarfod ymgynghori wyneb yn wyneb/rhithwir bob tri mis
  - o Lle bo'n briodol, bydd deunydd darllen i chi roi sylwadau arno a'i drafod yn ystod y cyfarfodydd yn cael ei gyhoeddi wythnos cyn pob cyfarfod
- Cymryd rhan mewn rhywfaint o ymgynghoriadau e-bost drwy gydol y flwyddyn mewn ymateb i geisiadau ad hoc a allai godi rhwng ymgynghoriadau chwarterol. Er enghraifft, efallai y byddwn am wirio geiriad datganiad i'r wasg gyda'r grŵp cyn ei gyhoeddi
- Hyrwyddo gwaith genomeg neu gyfleoedd i'ch cysylltiadau/rhwydweithiau yn ôl y gofyn (darperir cyfarwyddyd clir)
- Dod â'ch profiadau eich hun o brofion geneteg a genomeg i'r bwrdd, gan gynrychioli persbectif ehangach hefyd

### Sgiliau a Rhinweddau

Rydym yn chwilio am bobl (naill ai'n bersonol neu fel gofalwr neu aelod o'r teulu) sydd â phrofiad o unrhyw un o'r canlynol:

- Canserau etifeddol fel canser etifeddol y fron, y prostad, y coluddyn neu ganser yr ofari

# DISGRIFIAD SWYDD

## Bwrdd Seinio Cleifion a'r Cyhoedd



- Clefydau prin fel Ffeibrosis Systig, Clefyd Huntington, Sglerosis Clorog, Anemia Crymangell
- Anhwylderau Oedi Datblygiadol fel Anhwylderau ar y Sbectrwm Awtistig, X Fregus, Syndrom Down
- Derbyniwyd / cynigiwyd profion genetig ar gyfer diagnosis, triniaeth neu yn ystod beichiogrwydd
- Cymryd rhan mewn prawf meddygaeth fanwl neu 'bersonol', e.e. ar gyfer cancer
- Unrhyw ryngweithio â Gwasanaeth Genomeg Feddygol Cymru Gyfan

A:

- Gallu lleisio barn mewn modd adeiladol, mewn amgylchedd grŵp
- Yn gallu egluro'n glir pam y gall rhai cyfathrebiadau beri emosiynau cryf, dryswch neu ansicrwydd
- Yn gallu gwrando ar safbwyntiau eraill a'u parchu
- Yn deall y bydd Partneriaeth Genomeg Cymru yn defnyddio'r mewnwelediad cyfunol a geir i wella a llunio ein gwaith ond efallai na fydd yn gallu gweithredu pob awgrym unigol fyddwch yn ei gyflwyno

**Nid oes** angen y canlynol arnoch:

- Profiad gwyddonol neu ymchwil penodol; byddwn yn recriwtio yn seiliedig ar brofiad personol, felly nid ydym yn ceisio safbwyntiau proffesiynol
- Profiad siarad cyhoeddus neu hyfforddiant yn y cyfryngau

### Ymrwymiad Amser

- **Pedwar cyfarfod chwarterol** drwy gydol y flwyddyn – bydd y rhain yn cael eu cynnal yn rhithiwr (drwy Zoom) neu wyneb yn wyneb yng Nghaerdydd, Abertawe neu ganolbarth/gogledd Cymru. Bydd cyfarfodydd yn para tua chwe awr gan gynnwys seibiannau rheolaidd
- **Paratoi ar gyfer cyfarfodydd** – byddwn yn anfon unrhyw ddogfennau a deunyddiau atoch o leiaf wythnos ymlaen llaw fel y gallwch eu darllen a'u hystyried cyn y cyfarfod. Nid ydym yn disgwyl i'r gwaith paratoi gymryd mwy na dwy awr fesul cyfarfod
- **Ymgynghoriadau e-bost / ymgynghoriadau penodol** – yn ôl y gofyn. Mae nifer a math yr ymgynghoriadau e-bost yn amrywio ac ni fydd angen i chi ddarllen llawer o ddeunydd. Efallai y cewch gyfle hefyd i fynychu cyfarfodydd ychwanegol ar bynciau penodol
- **Cyfnod ymsefydlu a hyfforddiant undydd** fydd yn cael ei gynnal yn rhithiwr ddydd Mercher 6 Gorffennaf 2022, cyn y cyfarfod ymgynghori, fydd yn cael ei gynnal yn rhithiwr ddydd Iau 7 Gorffennaf 2022

### Hyd y Cyfnod

**O leiaf blwyddyn i ddechrau** gyda'r bwriad o ymestyn i flwyddyn arall yn seiliedig ar brofiad o'r flwyddyn gychwynnol

# DISGRIFIAD SWYDD Bwrdd Seinio Cleifion a'r Cyhoedd



## Hyfforddiant a Chymorth

Ar ddechrau eich cyfnod ar y Bwrdd Seinio byddwch yn derbyn:

- Diwrnod ymsefydlu a hyfforddiant fydd yn cwmpasu
  - o Gwybodaeth gyffredinol am Bartneriaeth Genomeg Cymru a'i sefydliadau partner i roi cyd-destun i'ch rôl a'ch helpu i ddeall diben eich rôl mewn perthynas â gwaith y fenter
  - o Gwybodaeth benodol am y Bwrdd Seinio; pwy ydym ni a beth rydym yn ei wneud
  - o Gwybodaeth gefndir gyffredinol am genomeg a hyfforddiant perthnasol wedi'i deilwra lle bo angen
- Cyswllt penodol ym Mhartneriaeth Genomeg Cymru y gallwch gysylltu ag ef os oes gennych unrhyw gwestiynau cyn, yn ystod neu ar ôl gweithgaredd
- Lle y bo'n briodol, dod i gysylltiad â gwahanol dimau'r sefydliadau partner e.e. Llywodraeth Cymru, GIG Cymru, Iechyd Cyhoeddus Cymru, timau cyfathrebu

## Treuliau

Mae taliad honorariwm ar gael i dalu am yr amser sydd ei angen i baratoi ar gyfer sesiynau ymgynghori a'u mynychu. Ar gyfer cyfarfodydd wyneb yn wyneb, bydd yr holl gostau teithio, llety, arlwy a chyfranogi rhesymol yn cael eu talu gan Bartneriaeth Genomeg Cymru yn unol â'n polisi\*. Bydd llety ac arlwy yn cael eu trefnu gennym ni os bydd angen.

## Lleoliad

Bydd cyfarfodydd ymgynghori chwarterol yn cael eu cynnal yn rhithiwr (drwy Zoom) neu wyneb yn wyneb yng Nghaerdydd, Abertawe neu yng nghanolbarth/gogledd Cymru. Byddwn yn darparu manylion am leoliadau cyfarfod ymlaen llaw – bydd pob lleoliad ar gael i'r rhai ag anghenion ychwanegol megis defnyddwyr cadeiriau olwyn, ac ati. Ar gyfer cyfarfodydd rhithwir, rhoddir manylion cysylltu ymlaen llaw.

## Cyfle Cyfartal

Ym Mhartneriaeth Genomeg Cymru (PGC) rydym yn cynnwys pobl o bob cefndir, waeth beth fo'u hoedran, rhyw, hunaniaeth o ran rhywedd, hil, anabled, cyfeiriadedd rhywiol, crefydd neu ddiwylliant. Yn y rôl hon efallai y byddwch yn gweithio gyda grŵp amrywiol o bobl a bydd angen i chi gynrychioli safbwyntiau'r bobl hynny. Mae PGC yn fenter i Gymru gyfan, ac felly rydym yn annog ceisiadau o bob rhan o'r wlad, yn ogystal â siaradwyr Cymraeg.

## Ffurflen Gais a Phroses Ddethol

- Os oes gennych ddiddordeb mewn gwneud cais am fod yn aelod o'r Bwrdd Seinio hwn, **cwblhewch y ffurflen Datganiad o Ddiddordeb gysylltiedig a'i chyflwyno i Ymchwil Iechyd a Gofal Cymru erbyn 31 Mai 2022.**
- Byddwn yn llunio rhestr fer o geisiadau ac yn gwahodd pobl sydd â sgiliau a phrofiad perthnasol i drafodaeth rithwir anffurfiol; byddwn yn cysylltu â phawb sy'n gwneud cais erbyn 7 Mehefin 2022 i roi gwybod i chi a ydych wedi cyrraedd y rhestr fer

# DISGRIFIAD SWYDD Bwrdd Seinio Cleifion a'r Cyhoedd



- Cynhelir trafodaethau rhithwir anffurfiol yn ystod yr wythnos sy'n dechrau 13 Mehefin 2022
- **Bydd ymgeiswyr llwyddiannus yn cael eu gwahodd i sesiwn ymsefydlu, hyfforddi ac ymgynghori rithiol dau ddiwrnod ar 6 a 7 Gorffennaf 2022. Mae eich argaeledd ar gyfer y sesiwn ymsefydlu a hyfforddi hon yn rhan o'r broses ddethol**

\*Mae ein polisi treuliau yn adlewyrchu canllawiau a gynhyrchwyd gan Ymchwil Iechyd a Gofal Cymru ar gyfer gweithgarwch cleifion a chynnwys y cyhoedd tebyg

## **Manylion cyswllt Partneriaeth Genomeg Cymru:**

D/O Ryan Moreland

Partneriaeth Genomeg Cymru, Sefydliad Geneteg Feddygol, Ysbyty Athrofaol Cymru, Parc y Mynydd Bychan, Caerdydd CF14 4XW

E-bost: [genomicpartnershipwales@wales.nhs.uk](mailto:genomicpartnershipwales@wales.nhs.uk) Gwefan: <https://genomicspartnership.wales/>

***Mae'r ddogfen hon ar gael yn Saesneg / This document is available in English***